

2.000'GARREN URTEKO EKINTZAK

Gabon Jaun-Andreok:

Oiko gure Batzar Nagusian oi dogun tez, igazko ekin-tzak azaltzean, jazokizun negargarri batek jota aurkitzen gara: Bilbao Arruza'tar Jon Erramun'en eriotzea.

Bera izan da urte askotan Euskerazaleak'en batzordeko langille neka-eziña, igarotako 25 azken urteotan gure erakundeari laguntza baliotsua emon dautsana, eta gaur bera joanda, gure idaztegian bere irudi maitekorra ikusten ez dogunean, antz emoten dausku altxor andi bat galdu dogula.

Edozelan be, dagoan lekutik badirudi aren laguntza artzen jarraitzen dogula, ordutik ona, langille bi gure batzordera etorri jakuzalako lan egiteko asmotan: Emilio Ormaetxea eta Paul Atutxa.

Zailla bada be Jon Erramun'en utsa zelan edo alan beteko dabe, euskerearen onerako bear doguzan ekintzak aurrera eroateko lagunduko dauskuena.

EUSKAL IKASTAROA

Igazko Urrilla'n, oi dan lez euskeraren ikastaroa asi zan, eta ikasleen kopurua betikoa jarraitu da. Izan be, arlo onek, aurrera jarraitzeko adoretzen dauan gure eragintza andia da, eta gure erakunde onen sortzailleen jomuga beteten dauna.

EUSKAL ASTEA

Urtero ospatzen dogun lez, aurten be Eskolapioen Ikastetxean Azilla'ren azkenean izan genduan. Gaiak benetan jakingarriak izan ziran, eta ona emen, ospakizun orren zeatzak:

Azilla'ren 27'an: "Bertsolaritza" - Legarreta'tar Asier'ek

Azilla'ren 28'an: "Bidetik amesetan" olerki txorta - Zubiri'tar Iñaki'k

Azilla'ren 29'an: "Trueba'tar Antonio Idazlea" - Olazar'tar Martiñ'ek

Azilla'ren 30'an: "Bidalgo Ikurrak Euskeraz" - Atutxa'tar Paul'ek

Gabonilla'ren 1 'goan: "Burdin Olak" - Olazar'tar Martiñ'ek

Itzaldiak oso jakingarriak izan ziran, baiña zoritxarrez, lengo urteetan baiña entzule gitxiago izan gendun. Gure ustez, bearreko zabalkundea ez gendualako egin, izan zan urrean. Urrengoan aleginduko gara entzule geiago ekarteko.

IPUIN SARIKETA

Euskerearen garapenerako oso lagungarria dan ekintza onetara igaz be dei egin gendun. Oraindiño, maikoek ez

dabe epaikuntzarik egin, baiña laster burutuko dabe, eta urrengoko "Zer" aldizkarian zeaztasunak argitaratuko doguz, baita irabazleen lanak agertuko be.

EGUTEGIA

Betiko oitureari jarraituz aurtengo egutegia atondo gendun, Bizkai Bilbao Kutzaren diru laguntzaz. Ale bat gura izatekotan eskatu daiteke BBK'ko idaztegiatan. Eguneroko orritxua gure etxeetan irakurtea oso lagungarria da gure euskerea zabaltzeko, eta norberaren ezagueria pixka bat egunero goratzeko.

"ZER" ALDIZKARIA

Bizkaierazko munduagaz lotzen gaituan aldizkari bakar au argitaratzen jarraitu dogu.

Ogei urte baiña geiago izango dira etenbarik argitaratu dogula aldizkari au, Olazar'tar Martiñ'en zuzendaritzapean, eta bizkaiereak aztuta izaten jarraitzen dauanean, atsegin andia da guretzat illero-illero bizkaierazko aldizkari bat irakurri aal izatea.

Egiari zor dautsagun begiruneaz esan bear dogu, Bizkai'ko Foru Aldundiaren Kultur Saillatik, laguntza geiago artzen asi gareala, eta Euskera eragiteko Zuzendari Nagusia da Gotzon Lobera'ri esker, aintzakotzat artuak izaten asi gara, eta badirudi, zorionez, orain arteko diruaren zailtasuna arintzen asi jakula.

Eta beti lez esango dautsuet, zuen idaz-lanak bialtzen jarraitu dagizuela, danen aalegiñak bearrekoak diralako gure aldizkariari ezinbesteko janaria emoteko.

LAGUNTZAK

Diru-laguntza bearrekoa da gure erakundeari arnasa emoteko, eta gure ekintzak garatzeko gai izateko, eta betiko ekintzak eta barriak burutzeko, bearrekoak dira zuen dirulaguntza ta aalegiñak.

Alde onetatik, bijoakez gure eskerrik beroenak, Bizkai'ko Aldundiaren Kultur saillari Bilbao'ko udalari, eta Bilbao Bizkaia Aurrezki Kutxari, orain arte artutako l aguntzagaitik.

Bailía oroz gain zuen urteko saria bearrekoa ta adorgarria da aurrera ekiteko eta bideko neskeak arintzeko. Ez aztu, beraz, BBKan dogun gure kontuari zuen urteko saria bialtzea.

**ZUBIRI'TAR IÑAKI
LENDAKARIAK**